

水經注匯校卷三十七

江西新城楊希閔卧雲校本

後魏 酈道元 撰

淹水 葉榆河 夷水 油水

澧水 沅水 浪水

淹水出越嶲遂久縣徼外

呂忱曰淹水一曰復水也

東南至青蛤縣

縣有禺同山其山神有金馬碧雞光景儵忽民多見之漢宣帝遣諫大夫王褒祭之欲致其雞馬褒道病而卒是不果焉王褒碧雞頌曰敬移金精神馬縹縹碧雞故左太冲蜀都賦曰金馬騁光而絕影碧雞儵忽而耀儀

水經注匯校 卷三十七

又東過姑復縣南東入于若水

淹水逕縣之臨池澤而東北逕雲南縣西東北注若水之

益州葉榆河出其縣北界屈從縣東北流

縣故滇池葉榆之國也漢武帝元封二年使唐蒙間之以爲益州郡郡有葉榆縣縣西北八十里有弔鳥山衆鳥千百爲羣其會嗚呼啁晰每歲七八月至十六七日則止一歲六至雉雀來弔夜燃火伺取之其無嗉不食似特悲者以爲義則不取也俗言鳳凰死于此山故衆鳥來弔因名弔鳥縣之東有葉榆澤葉榆水所鍾而爲此川藪也

過不韋縣

縣故九隆哀牢之國也有牢山其先有婦人名沙壹居于

牢山捕魚水中觸沈木若有感因懷孕產十子後沈木化為龍出水九子驚走小子不能去背龍而坐龍因舐之其母鳥語謂背為九謂坐為隆因名為九隆案華陽國志作漢言陪元隆云元隆猶坐也及長諸兄遂相共推九隆為王後牢山下有一夫一婦生十女九隆皆以為妻遂因孽育皆畫身像龍文衣皆背尾九隆死世世不與中國通漢建武二十三年王遣兵來乘革船南下攻漢鹿芎民鹿芎民弱小將為所擒于是天大震雷疾雨南風漂起水為逆流波湧二百餘里革船沈沒溺死數千人後數年復遣六王將萬許人攻鹿芎鹿芎王與戰殺六王哀牢耆老共埋之其夜虎掘而食之明旦但見骸骨驚怖引去乃懼謂其耆老小王曰哀牢犯

水經注匯校

卷三十七

二

徼自古有之今此攻鹿芎輒被天誅中國有受命之王乎何天祐之明也即遣使詣越巂奉獻求乞內附長保塞徼漢明帝永平十二年置為永昌郡郡治不韋縣蓋秦始皇徙呂不韋子孫于此故以不韋名縣沈氏云常璩謂武帝置不韋縣徙南越相呂嘉宗族于此因名不韋以彰其先人之惡非秦徙也北去葉榆六百餘里葉榆水不逕其縣自不韋北注者盧倉禁水耳葉榆水自縣南逕遂久縣東又逕姑復縣西與淹水合又東南逕永昌邪龍縣縣以建興三年劉禪分隸雲南于不韋縣為東北

東南出益州界

葉榆水自邪龍縣東南逕秦臧縣南與濮水同注滇池澤于連然雙柏縣也葉榆水自澤又東北逕滇池縣南又東

逕同竝縣南何云竝音又東逕漏江縣伏流山下復出蝮

口謂之漏江左思蜀都賦曰漏江洑流潰其阿汨若湯谷

之揚濤沛若濛汜之湧波諸葛亮之平南中也戰于是水

之南葉榆水又逕賁古縣北何云賁音奔東與盤江合盤水出

律高縣東南監町山朱箋師古注監音呼東逕梁水郡北賁

古縣南案梁水郡晉置領梁水賁古西隨水廣百餘步深

處十丈甚有瘴氣朱褒之反李恢追至盤江者也建武十

九年伏波將軍馬援上言從蒼冷出賁古擊益州臣所將

駱越萬餘人便習戰鬪者三千兵以上弦毒矢利以數發

矢注如雨所中輒死愚以行兵此道最便蓋承藉水利用

為神捷也盤水又東逕漢興縣山溪之中多生邛竹檉榔

水經注匯校 卷三十七

檉樹出麩而夷人資以自給故蜀都賦曰邛竹緣嶺又曰

麩有桄榔盤水北入葉榆水諸葛亮入南戰于盤東是也

入牂牁郡西隨縣北為西隨水又東出進桑關

進桑縣牂牁之南部都尉治也水上有關故曰進桑關也

故馬援言從蒼冷水道出進桑王國至益州賁古縣轉輸

通利蓋兵車資運所由矣自西隨至交趾崇山接險水路

三千里葉榆水又東南絕温水而東南注于交趾

過交趾蒼冷縣北分為五水絡交趾郡中至南界復合為三

水東入海

尚書大傳曰堯南撫交趾于禹貢荊州之南垂幽荒之外

故越也周禮南八蠻雕題交趾有不粒食者焉春秋不見

于傳不通于華夏在海島人民鳥語秦始皇開越嶺南立  
蒼梧南海交趾象郡漢武帝元鼎二年始并百越啓七郡  
于是乃置交趾刺史以督領之初治廣信所以獨不稱州  
時又建朔方明已始開北垂遂辟交趾于南爲子孫基址  
也。蒼洽縣漢武帝元鼎六年開都尉治交州外域記曰越  
王合二使者典主交趾九真二郡民後漢遣伏波將軍路  
博德討越王路將軍討合浦越王合二使者齋牛百頭酒  
千鍾及二郡民戶口簿詣路將軍乃拜二使者爲交趾九  
真太守諸雒將主民如故。沈氏大成云乾隆丁丑兩淮運  
使得一玉印徑二寸文曰主民  
欲以充貢詢廣陵賞鑒家皆  
不知所出甚矣博物之難交趾郡及州本治于此也州  
名爲交州後朱戴雒將子名詩索蒼洽雒將女名徵側爲

水經注匯校

卷三十七

四

妻側爲人有膽勇將詩起賊

趙云將詩起賊謂徵側將其夫作賊也

攻破諸

郡服諸雒將皆屬徵側爲王治蒼洽縣復交趾九真二郡  
民二歲調賦後漢遣伏波將軍馬援將兵討側詩走入金  
溪究三歲乃得爾時西蜀竝遣兵共討側等悉定郡縣爲  
令長也。山多大蛇名曰髯蛇長十丈圍七八尺常在樹上  
伺鹿獸鹿獸過便低頭繞之有頃鹿死先濡令濕訖便吞  
頭角骨皆鑽皮出山夷始見蛇不動時便以大竹籤籤蛇  
頭至尾殺而食之以爲珍異故楊氏南裔異物志曰趙云  
隋經  
藉志交州異物  
志一卷陽孚撰髯惟大蛇既洪且長采色駸犖其文錦章  
食豕吞鹿腴成養創賓享嘉宴是豆是觴言其養創之時  
肪腴甚肥搏之以婦人衣投之則蟠而不起走便可得也

北二水左水東北逕望海縣南建武十九年馬援征徵側  
置又東逕龍淵縣北又東合南水水自蒼洽縣東逕封溪  
縣北交州外域記曰交趾昔未有郡縣之時土地有雒田  
其田從潮水上下民墾食其田因名爲雒民設雒王雒侯  
主諸郡縣縣多爲雒將雒將銅印青綬後蜀王子將兵三  
萬來討雒王雒侯服諸雒將蜀王子因稱爲安陽王後南  
越王尉佗舉衆攻安陽王安陽王有神人名皋通下輔佐  
爲安陽王治神弩一張一發殺三百人南越王知不可戰  
卻軍住武甯縣按晉太康記縣屬交趾全云按晉九字南  
注中注下同南  
越閱案南字  
依趙本加遣太子名始降服安陽王稱臣事之安陽王  
不知通神人遇之無道通便去語王曰能持此弩王天下

不能持此弩者亡天下通去安陽王有女名曰媚珠見始  
端正珠與始交通始問珠令取父弩視之始見弩便盜以  
鋸截弩訖便逃歸報南越王南越進兵攻之安陽王發弩  
弩折遂敗安陽王下船逕出于海今平道縣後王宮城見  
有故處晉太康地記縣屬交趾越遂服諸雒將馬援以西  
南治遠路逕千里分置斯縣治城郭穿渠通導漑灌以利  
其民縣有猩猩獸形若黃狗又狀狢狢人面頭顏端正善  
與人言音聲麗妙如婦人好女對語交言聞之無不酸楚  
其肉甘美可以斷穀窮年不厭又東逕浪泊馬援以其地  
高自西里進屯此又東逕龍淵縣故城南又東左合北水  
建安二十三年立州之始蛟龍蟠編于南北二津故改龍

淵以龍蟠爲名也。盧循之寇交州也。交州刺史杜慧度率水步晨出南津以火箭攻之。燒其船艦。一時潰散。循亦中矢赴水而死于。是斬之傳首京師。慧度以斬循勳封龍編侯。劉欣期交州記曰：龍編縣功曹左飛曾化爲虎。數月還作吏。旣言其化亦化無不在。牛哀易虎不識厥兄。當其革狀安知其譌變哉。其水又東逕曲易縣。東流注于浪鬱。經言于郡東界。復合爲三水。此其二也。全云此其二也。二水謂南水北水。其次一水謂中水。合之爲三水。其次一水東逕封溪縣南。又西南逕西于縣南。又東逕羸樓縣北。又東逕北帶縣南。又東逕稽徐縣。涇水注之。水出龍編縣高山東南。流入稽徐縣。注于中水中。水又東逕羸樓縣南。交州外域記曰：縣本交趾郡治也。林

水經注匯校

卷三十七

六

邑記曰：自交趾南行都官塞浦出焉。其水自縣東逕安定縣北。帶長江。江中有越王所鑄銅船。潮水退時人有見之者。其水又東流。隔水有泥黎城。言阿育王所築也。又東南合南水。南水又東南逕九德郡北。交州外域記曰：交趾郡界有扶嚴。究在郡之北。隔渡一江。卽是水也。江水對交趾。朱載縣又東逕浦陽縣北。又東逕無切縣北。建武十九年九月。馬援上言：臣謹與交趾精兵萬二千人。與大兵合二萬人。船車大小二千艘。自入交趾。于今爲盛。十月。援南入九真。至無切縣。賊渠降。進入餘發。渠帥朱伯棄郡亡。入深林。巨藪。犀象所聚。羊牛數千頭。時見象數十百。爲羣。援又分兵入無編縣。王莽之九真亭。至居風縣。帥不降。竝斬級。

數十百九真乃靖其水又東逕句漏縣縣帶江水江水對安定縣林邑記所謂外越安定紀粟者也縣江中有潛牛形似水牛上岸鬪角軟還入江水角堅復出又東與北水合又東注鬱亂流而逝矣此其三也平撮通稱同歸鬱海故經有入海之文矣

夷水出巴郡魚復縣江

夷水卽俱山清江也水色清照十丈分沙石蜀人見其澄清因名清江也昔廩君浮土舟於夷水據捍關而王巴是以法孝直有言魚復捍關臨江據水實益州禍福之門夷水又東逕建平沙渠縣縣有巫城水南岸山道五百里其水歷縣東出焉

水經注匯校

卷三十七

七

東南過俱山縣南

夷水自沙渠縣入水流淺狹裁得通船東逕難留城南城卽山也壁立峻絕西面上里餘得石穴把火行百許步得二大石磧竝立穴中相去一丈俗名陰陽石陰石常濕陽石常燥每水旱不調居民作威儀服飾往入穴中旱則鞭陰石應時雨多雨則鞭陽石俄而大晴相承所說往往有效但捉鞭者不壽人頗惡之故不爲也東北面又有石室可容數百人每亂民入室避賊無可攻理因名難留城也昔巴蠻有五姓未有君長俱事鬼神乃共擲劍于石穴約能中者奉以爲君巴氏子務相乃中之又令各乘土舟約浮者當以爲君惟務相獨浮因共立之是爲廩君乃乘土

舟從夷水下至鹽陽鹽水有神女謂廩君曰此地廣大魚鹽所出願留共居廩君不許鹽神暮輒來宿旦化為蟲羣飛蔽日天地晦冥積十餘日廩君因伺便射殺之天乃開明廩君乘土舟下及夷城夷城石岸險曲其水亦曲廩君望之而歎山崖為崩廩君登之上有平石方二丈五尺因立城其傍而居之四姓臣之死精魂化而為白虎故巴氏以虎飲人血遂以人祀鹽水即夷水也全云江水篇夷水出夷溪鹽水出巫溪今此合為一又有鹽石即陽石也盛弘之以是推之疑即廩君所射鹽神處也將知陰石是對陽石立名矣事既鴻古難為明徵夷水又東逕石室在層巖之上石室南向水出其下懸巖千仞自水上徑望見每有陟山嶺者扳木側足而

水經注匯校

卷三十七

行莫知其誰村人駱都小時到此室邊採蜜見一仙人坐石牀上見都凝矚不轉都還招村人重往則不復見鄉人今名為仙人室袁山松云都孫息尚存夷水又東與溫泉三水合大溪南北夾岸有溫泉對注夏煖冬熱上常有霧氣瘍瘕百病浴者多愈父老傳此泉先出鹽于今水有鹽氣夷水有鹽水之名此亦其一也夷水又東逕佷山縣故城南縣即山名也孟康曰音恆出藥草恆山今世以銀為音也全云孟康十七字注中注舊武陵之屬縣南一里即清江東注矣南對長楊溪溪水西南潛穴穴在射堂村東六七里谷中有石穴清泉潰流三十許步復入穴即長楊之源也水中有神魚大者二尺小者一尺居民釣魚先陳所須多少拜



而請之拜訖投鉤餌得魚過數者水輒波湧暴風卒起樹木摧折水側生異花路人欲摘者皆當先請不得輒取水源東北之風井山迴曲有異勢穴口大如盆袁山松云夏則風出冬則風入春秋分則靜余往觀之其時四月中去穴數丈須臾寒飄卒至六月中尤不可當往人有冬過者置笠穴中風吸之經月還步楊溪得其笠則知潛通矣其水重源顯發北流注于夷水此水清冷甚于大溪縱暑伏之辰尙無能燥其津流也縣北十餘里有神穴平居無水時有渴者誠啓請乞輒得水或戲求者水終不出縣東十許里至平樂村又有石穴出清泉中有潛龍每至大旱平樂左近村居輦草穢著穴中龍怒須臾水出蕩其草穢傍

水經注匯校

卷三十七

九

側之田皆得澆灌從平樂順流五六里東亭村北山甚高峻上合下空空竅東西廣二丈許起高如屋中有石牀甚整頓傍生野韭人往乞者神許則風吹別分隨偃而輸不得過越不偃而輸閱案兩輸字趙本作掬輒凶往觀者去時特平暨處自然恭肅矣

又東過夷道縣北

夷水又東逕虎灘岸石有虎像故因以名灘也夷水又東逕釜瀨其石大者如釜小者如刁斗形色亂真惟實中耳夷水又東北有水注之其源百里與丹水出西南望州山山形竦峻峯秀甚高東北白巖壁立西南小演通行登其頂平可有三晦許上有故城城中有水登城望見一州之

境故名望州山。俗語訛今名武鍾山。山根東有湧泉成溪。卽丹水所發也。下注丹水。天陰欲雨。輒有赤氣。故名曰丹水矣。丹水又逕亭下有石穴甚深。未嘗測其遠近。穴中蝙蝠大如烏。多倒懸。玄中記曰：蝙蝠百歲者倒懸。得而服之。使人神仙。穴口有泉。冬溫夏冷。秋則入藏。春則出遊。案二魚之出入此上當有脫文民至秋闌。斷水口得魚。大者長四五尺。骨軟肉美。異于餘魚。丹水又逕其下。積而爲淵。淵有神龍。每旱。村人以芮草投淵。上流魚則多死。龍怒。當時大雨。丹水又東北流。兩岸石上有虎跡甚多。或深或淺。皆悉成就。自然咸非人工。丹水又北注于夷水。水色清澈。與大溪同。夷水又東北逕夷道縣北而東注。

水經注匯校

卷三十七

十

東入于江

夷水又逕宜都北。東入大江。有涇渭之比。亦謂之恨山。北溪水所經。皆石山。畧無土岸。其水虛映。俯視遊魚如乘空也。淺處多五色石。冬夏激湍。飛清傍多茂木。空岫靜夜聽之。恆有清響。百鳥翔禽哀鳴。相和巡頽浪者。不覺疲而忘歸矣。

油水出武陵孱陵縣西界

縣有白石山。油水所出。東逕其縣西。與滄水合。水出高城。縣滄山東。逕其縣下。東至孱陵縣入油水也。

東過其縣北

縣治故城。王莽更名孱陵也。劉備孫夫人權妹也。又更修

之其城背油向澤

又東北入于江

油水自孱陵縣之東北逕公安縣西又北流注于大江

澧水出武陵充縣西歷山東過其縣南

趙云錐指以澧水附導江

澧水自縣東逕臨澧零陽二縣故界水之南岸白石雙立厥狀類人高各三十丈周四十丈古老傳言昔充縣尉與零陽尉共論封境因相傷害化而為石東標零陽西揭充縣充陽廢省臨澧即其地縣即充縣之故治臨側澧水故為縣名晉太康四年置澧水又東茹水注之水出龍茹山水色清澈漏石分沙莊辛說楚襄王所謂飲茹溪之流者也茹水東注澧水

水經注匯校

卷三十七

十一

又東過零陽縣之北

澧水東與溫泉水會水發北山石穴中長三十丈冬夏沸湧常若湯焉溫水南流注于澧水澧水又東合零溪水源南出零陽之山歷溪北注澧水澧水又東九渡水注之水分南出九渡山山下有溪又以九渡為名山獸咸飲此水而逕越他津皆不飲之九渡水北逕仙人樓下傍有石形極方峭世名之為仙樓水自下歷溪曲折透池傾注行者間關每所褰泝山水之號蓋亦因事生焉九渡水又北流注于澧水澧水又東婁水入焉水源出巴東界東逕天門郡婁中縣北又東逕零陽縣注于澧水澧水又東逕零陽縣南縣即零溪以著稱主澧水又逕溇陽縣右會溇水水出

建平郡東逕溧陽縣南晉太康中置溧水又左合黃水黃水出零陽縣西北連巫山溪出雄黃頗有神異採常以冬月祭祀鑿石深數丈方得佳黃故溪水取名焉黃水北流注于溧水溧水又東注澧水謂之溧口澧水又東逕澧陽縣南南臨澧水晉太康四年立天門郡治也吳永安六年武陵郡高梁山高峯孤竦素壁千尋望之茗亭有似香爐其山洞開玄朗如門高三百丈廣二百丈門角上各生一竹倒垂下拂謂之天帚孫休以爲嘉祥分武陵置天門郡澧水又東歷層步山高秀特出山下有峭澗泉流所發南流注于澧水

又東過作唐縣北

水經注匯校 卷三十七

三

作唐縣後漢分孱陵縣置澧水入縣左合涔水水出西北天門郡界南流逕涔坪屯屯竭涔水溉田數千頃又東南流注于澧水澧水又東澹水出焉澧水又南逕故郡城東東轉逕作唐縣南澧水又東逕南安縣南晉太康元年分孱陵立澹水注之水上承澧水于作唐縣東逕其縣北又東注于澧謂之澹口王仲宣贈士孫文始詩曰悠悠澹澧者也趙云文選李善注士孫孺子名萌字文始卽士孫瑞之子獻帝都許錄瑞之功封萌都亭侯也澧水又東與赤沙湖水會湖水北通江而南注澧謂之沙口澧水又東南注于沅水曰澧口蓋其枝瀆耳離騷曰沅有芷兮澧有蘭

又東至長沙下雋縣西北東入于江

澧水流注于洞庭湖俗謂之曰澧江口也

沅水出牂柯且蘭縣爲旁溝水又東至鐔成縣爲沅水東過無陽縣

無水出故且蘭南流至無陽故縣縣對無水因以氏縣無水又東南入沅謂之無口沅水東逕無陽縣南臨運水水源出東南岸許山西北逕其縣南流注于熊溪熊溪南帶移山山本在水北夕中風雨旦而山移水南故山以移爲名蓋亦蒼梧郁州東武怪山之類也熊溪下注沅水沅水又東逕辰陽縣縣有龍溪水南出于龍嶠之山北流入于沅沅水又東溢水注之水南出扶陽之山北流會于沅沅水又東與序溪合水出武陵郡義陵縣鄜梁山西北流逕

水經注匯校

卷三十七

三

義陵縣王莽之建平縣也治序溪其城劉備之秭歸馬良出五溪綏撫蠻夷良率諸蠻所築也所治序溪最爲沃壤良田數百頃特宜稻修作無廢又西北入于沅沅水又東合澗水水導源澗溪北流注沅沅水又東逕辰陽縣南東合辰水水出縣三山谷東南流獨母水注之水源南出龍門山歷獨母溪北入辰水辰水又逕其縣北舊治在辰水之陽故卽名焉楚辭所謂夕宿辰陽者也王莽更名會亭矣辰水又右會沅水名之爲辰溪口武陵有五溪謂雄溪楠溪無溪酉溪辰溪其一焉夾溪悉是蠻左所居故謂此蠻五溪蠻也沅水又逕沅陵縣西有武溪源出武山與酉陽分山水源石上有盤瓠跡猶存矣盤瓠者高辛氏之畜

狗也其毛五色高辛氏患犬戎之暴乃募天下有能得犬戎之將軍吳將軍頭者妻以少女下令之後盤瓠遂銜吳將軍之首于闕下帝大喜未知所報女聞之以爲信不可違請行乃以配之盤瓠負女入南山上石室中所處險絕人跡不至帝悲思之遣使不得進經二年生六男六女盤瓠死因自相夫妻織績木皮染以草實好五色衣裁製皆有尾其母白帝賜以名山其後滋蔓號曰蠻夷今武陵郡夷卽盤瓠之種落也其狗皮毛嫡孫世實錄之武水南流注于沅沅水又東施水注之水南出施山溪源有陽欺崖崖色純素望同積雪下有二石室先有人居處其間細泉輕流望川競注故不可得以言也施水北流會于沅沅水

水經注匯校

卷三十七

西

又東逕沅陵縣北漢故頃侯吳陽之邑也王莽改曰沅陵縣北枕沅水沅水又東逕縣故治北移縣治縣之舊城置都尉府因岡傍阿勢盡川陸臨沅對西二川之交會也西水閔案延江水篇未一見西水名目而源流則附見此篇中故旁識三。以別之導源益州巴郡臨江縣故武陵之充縣西源山東南流逕無陽故縣南又東逕遷陵故縣界與西鄉溪合卽延江之枝津更始之下流謂之西鄉溪口西水又東逕遷陵縣故城北王莽更名曰遷陸也西水東逕酉陽故縣南縣故酉陵也西水又東逕沅陵縣北又東南逕潘承明壘西何云吳志淵潘字承明承明討五溪蠻營軍所築也其城跨山枕谷西水又南注沅水關關謂之受水其水所決入名曰西口沅水又逕竇應明城

側應明以元嘉初伐蠻所築也。沅水又東，溪水南出茗山，山深迴險，人獸阻絕。溪水北瀉，沅川。沅水又東，與諸魚溪水合。水北出諸魚山，山與天門郡之澧陽縣分嶺。溪水南流，會于沅。沅水又東，夷水入焉。水南出夷山，北流注沅。夷山東接壺頭山，山高一百里，廣圓三百里。山水下，水際有新息侯馬援征武溪蠻，停車處。壺頭徑曲多險，其中紆折千灘。援就壺頭，希效早成。道遇瘴毒，終沒于此。忠公獲謗，信可悲矣。劉澄之曰：沅水自壺頭枝分，跨三十三渡，逕交趾龍編縣東北，入于海。脈水尋梁，乃非關究。但古人許以傳疑，聊書所聞耳。

又東北過臨沅縣南

水經注匯校

卷三十七

五

臨沅縣與沅南縣分水。沅南縣西有夷望山，孤竦中流，浮險四絕。昔有蠻民避寇，居之，故謂之夷望也。南有夷望溪水，南出重山，遠注沅。沅水又東，得關下山，東帶關溪，瀉注沅。瀆。沅水又東，歷臨沅縣西，爲明月池，白壁灣灣，狀半月。清潭鏡澈，上則風籟空傳，下則泉響不斷。行者莫不擁楫嬉游，徘徊愛玩。沅水又東，歷三石澗，鼎足均峙，秀若削成。其側茂竹，便娟致可玩也。又東，帶綠蘿山，綠蘿蒙羃，頽巖臨水，實釣渚，漁詠之勝地。其迭響若鍾音，信爲神仙之所居。沅水又東，逕平山，西南臨沅水，寒松上蔭，清泉下注，栖託者不能自絕于其側。沅水又東，逕臨沅縣南，縣南臨沅水，因以爲名。王莽更之曰監沅也。縣南有晉徵士漢壽人。

龔立之墓銘太元中車武子立縣治武陵郡下本楚之黔中郡矣秦昭襄王二十七年使司馬錯以隴蜀軍攻楚楚割漢北與秦至三十年秦又取楚巫黔及江南地以爲黔中郡漢高祖二年割黔中故治爲武陵郡王莽更之曰建平也南對沅南縣後漢建武中所置也縣在沅水之陰因以沅南爲名縣治故城昔馬援討臨鄉所築也沅水又東歷小灣謂之枉渚渚東里許便得枉人山山西帶修溪一百餘里茂竹便娟披溪蔭渚長川逕引遠注于沅沅水又東入龍陽縣有淡水出漢壽縣西楊山南流東折逕其縣南縣治索城卽索縣之故城也漢順帝陽嘉中改從今名關駟以爲興水所出東入沅而是水又東歷諸湖方南注

水經注匯校

卷三七

沅亦曰漸水也水所入之處謂之鼎口沅水又東歷龍陽縣之汜洲洲長二十里吳丹楊太守李衡植柑于其上臨死勅其子曰吾州里有木奴千頭不責衣食歲絹千匹太史公曰江陵千樹橘可當封君此之謂矣吳末衡柑成歲絹千匹今洲上猶有陳根餘枿蓋其遺也沅水又東逕龍陽縣北城側沅水沅水又東合壽溪內通大溪口有木連理根各一岸而凌空交合其上承諸湖下注沅水又東至長沙下雋縣西北入于江

沅水下注洞庭湖湖方會于江

浪水閔案浪音銀

出武陵潭成縣北界沅水谷

山海經曰禱過之山浪水出焉而南流注于海是也



南至鬱林潭中縣與鄰水合

水出無陽縣故罽成也晉義熙中改從今名俗謂之移溪溪水南歷潭中注于浪水

又東至蒼梧猛陵縣為鬱溪又東至高要縣為大水

鬱水出鬱林之阿林縣東逕猛陵縣猛陵縣在廣信之西南王莽之猛陸也浪水于縣左合鬱溪亂流逕廣信縣地理志蒼梧郡治武帝元鼎六年開王莽之新廣郡縣曰廣信亭王氏交廣春秋曰元封五年交州自羸樓縣移治于此建安十六年吳遣臨淮步騭為交州刺史將武吏四百人之交州道路不通蒼梧太守長沙吳巨擁眾五千騭有疑于巨先使諭巨巨迎之于零陵遂得進州巨既納騭而

水經注匯校 卷三十七

後有悔騭以兵少恐不存立巨有都督區景勇畧與巨同士為用騭惡之陰使人請巨巨往告景勿詣騭騭請不已景又往乃于廳事前中庭俱斬以首徇眾即此也鬱水又逕高要縣晉書地理志曰縣東去郡五百里刺史夏避毒徙縣水居也縣有鵠奔亭廣信蘇施妻始珠鬼訟于交州刺史何敞處事與蘩亭女鬼同案蘩郃古字通原本及近刻並訛作釐亭今改正蘩亭事詳渭水注內王氏交廣春秋曰步騭殺吳巨區景使嚴舟船合兵二萬下取南海蒼梧人衡殺錢博宿巨部伍興軍逆騭于蒼梧高要峽口兩軍相逢于是遂交戰毅與眾投水死者千有餘人

又東至南海番禺縣西分為二其一南入于海

鬱水分浪南注

其一又東過縣東南入于海

浪水東別逕番禺山海經謂之賁禺者也交州治中合浦姚文式問云何以名爲番禺答曰南海郡昔治在今州城中與番禺縣連接今入城東南偏有水坑陵城倚其上聞此縣人名之爲番山縣名番禺儻謂番山之禺也漢書所謂浮牂柯下離津同會番禺蓋乘斯水而入越也秦并天下畧定揚越置東南一尉西北一候開南海以謫徙民至二世時南海尉任囂召龍川令趙佗曰聞陳勝作亂豪桀叛秦吾欲起兵阻絕新道番禺負險可以爲國會病綿篤無人與言故召公來告以大謀囂卒佗行南海尉事則拒

水經注匯校

卷三十七

六

關門設守以法誅秦所置吏以其黨爲守自立爲王高帝定天下使陸賈就立佗爲南越王剖符通使至武帝元鼎五年遣伏波將軍路博德等攻南越王五世九十二歲而亡以其地爲南海蒼梧鬱林合浦交趾九真日南也建安中吳遣步騭爲交州騭到南海見土地形勢觀尉佗舊治處負山帶海博敞渺日高則桑土下則沃衍林麓鳥獸于何不有海怪魚鼈鼉鱉鮮鱐珍怪異物千種萬類不可勝記佗因岡作臺北面朝漢圓基千步直峭百丈頂上三晦復道迴環透迤曲折朔望升拜名曰朝臺前後刺史郡守遷除新至未嘗不乘車升履于焉逍遙騭登高遠望觀巨海之浩茫觀原藪之殷阜乃曰斯誠海島膏腴之地宜爲

都邑。建安二十二年遷州番禺築立城郭綏和百越遂用甯集交州治中姚文式問答云朝臺在州城東北三十里裴淵廣州記曰城北有尉佗墓墓後有大岡謂之馬鞍岡秦時占氣者言南方有天子氣始皇發民鑿破此岡地中出血今鑿處猶存以狀取目故岡受厥稱焉王氏交廣春秋曰越王趙佗生有奉制稱藩之節死有秘奧神密之墓佗之葬也因山爲墳其壙可謂奢大葬積珍玩吳時遣使發掘其墓求索棺槨鑿山破石費日損力卒無所獲佗雖奢僭慎終其身乃令後人不知其處有似松喬遷景牧豎固無所殘矣鄧德明南康記曰昔有盧耽仕州爲治中少棲仙術善解雲飛每夕輒凌虛歸家曉則還州嘗于元

會。至朝不及朝。列化爲白鵠。至闕前迴翔欲下。威儀以石擲之。得一隻履。耽驚還就列。內外左右莫不駭異。時步隲爲廣州意甚惡之。便以狀列聞。遂至誅滅。廣州記稱吳平晉。滕修爲刺史。修鄉人語。修鰓鬚長一赤。修責以爲虛。其人乃至東海。取鰓鬚長四赤。速送示脩。脩始服謝。厚爲遣其一水南入者。鬱川分派。逕四會入海也。其一卽川東別逕番禺城下。漢書所謂浮牂柯下。離津同會番禺。蓋乘斯水而入于越也。趙云漢書以下與前文複蓋刪削之未盡者浪水又東逕懷化縣入于海水。有鰓魚。裴淵廣州記曰鰓魚長二丈。大數圍。皮皆鱗物。生子子小。隨母親食。驚則還入母腹。吳錄地理志曰鰓魚子朝索食。暮入母腹。南越志曰暮從臍入。旦從

口○出○腹○裏○兩○洞○腸○貯○水○以○養○子○腸○容○二○子○兩○則○四○焉○

其餘水又東至龍川為涅水屈北入員水案考注稱浪水枝

水也又稱逕博羅縣西界龍川即解東至龍川也下經員水又東南即承此員水言也

浪水枝津衍注自番禺東歷增城縣南越志曰縣多鷄鷄

鷄鷄山雞也光采鮮明五色炫耀利距善鬪世以家雞鬪

之則可擒也何云可入雉媒詩又逕博羅縣西界龍川左思所謂

目龍川而帶垌者也趙佗乘此縣而跨據南越矣

員水又東南一千五百里入南海

東歷揭陽王莽之南海亭而注于海也

水經注匯校卷三十七終

水經注匯校

卷三十七